

Prema istraživanju projekta BiHStudenti.com

Većina mladih želi se vratiti u BiH

Većina mladih iz BiH se, suprotno javnom razmišljanju, planira vratiti u svoju zemlju po završetku studija u inostranstvu, pokazuju rezultati ankete koju je krajem prošle godine proveo tim projekta BiHStudenti.com s namjerom da analizira razmišljanja mladih bh. intelektualaca koji se

nalaze van zemlje, javila je Fena.

Prema rezultatima istraživanja, 76 posto ispitanika razmišlja o traženju posla u BiH, a 64 posto njih trenutno studira. Samo 10 posto mladih ne planira se vratiti da radi u BiH, dok se 57 posto planira vratiti (29 posto ove grupe bi se vratilo u BiH odmah). Gotovo

četvrtina anketiranih još ne zna da li bi se vratila i zaposlila u BiH.

Na pitanje šta ih najviše sprečava da se vrate i nađu posao u BiH, više od 55 posto mladih izjavilo je da je to politička situacija, a više od 53 posto ispitanih smatra kvalitet poslova najslabijim aspektom bh. radnog tržišta.